



Broj: 01/1-02-655/17  
Breza, 26.04.2017. godine

## Z A P I S N I K

**SA TEMATSKE SJEDNICE Općinskog vijeća održane dana 12.04.2017. godine sa početkom u 16,30 sati u prostorijama Općine Breza-Sala Općinskog vijeća.**

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 14 vijećnika.

Izostanak sa sjednice najavili su vijećnici: Zaimović Anes, Jekalović Amina, Ahmedspahić Mrza, Bašić Mirnes, Beširević Selma, dok su vijećnici Namik Muraović i Fetah Bajrić najavili su zakašnjenje.

Osim vijećnika sjednici Općinskog vijeća su prisustvovali: Općinski načelnik Zaimović Munib, pomoćnici općinskog načelnika, Smajila Omerhodžić, Salih Hasanspahić, Meliha Beširević, općinski pravobranilac Dženana Telalović, predstavnici JP „Komunalno „ d.o.o. Breza, predsjednik SDA, i predstavnici medija .

Predsjedavajući Općinskog vijeća upoznao je vijećnike da je 15.03.2017 godine održan sastanak predsjednika klubova te je nakon rasprave dogovoreno da se održi tematska sjednica na temu „Upravljanje komunalnom otpadom na području Općine Breza“.

Dogovoreno je da se tematska sjednica Općinskog vijeća Breza održi 12.04.2017 godine, temeljito pripremi sa prijedlogom konkretnih mjera selektivnog upravljanja komunalnim otpadom.

Primjedbi na predloženi dnevni red nije bilo te se pristupilo glasanju za sljedeći

## D N E V N I R E D

1. Upravljanje komunalnim otpadom na području Općine Breza“.

Nakon provedenog postupka konstatovano je da je dnevni red usvojen jednoglasno sa 14 glasova ZA , bez protiv i suzdržanih glasova.

### Ad 1.

Razmatranje Informacije Upravljanje komunalnom otpadom na području Općine Breza.

Pomoćnik općinskog načelnika Salih Hasanspahić u uvodnim napomenama hronološki je upoznao vijećnike o statusu JP „Komunalno“ d.o.o. Breza, koje je kao društvo sa ograničenom odgovornošću u skladu sa Zakonom o javnim preduzećima sa 100 % državnim kapitalom organizovano je na osnovu Odluke Općinskog vijeća Breza 2005. godine, kada je izvršeno i usklađivanje statusa preduzeća sa Zakonom o javnim preduzećima i Zakonom o privrednik društvima. Pripajanje JP „Toplane“ izvršeno je 2005. godine Odlukom Općinskog vijeća Breza tadašnjem Javnom komunalnom preduzeću „Breza“ Breza. Na osnovu navedenih odluka Rješenjem Općinskog suda u Zenici registrovana su i izvršena

usklađivanja nakon čega preduzeće posluje pod sadašnjim imenom i pravni je sljedbenik Javnog komunalnog preduzeće „Breza“ Brezi.

U daljem izlaganju upoznao je prisutne o organizacionoj šemi preduzeće, broju zaposlenih te o materijalno tehničkim sredstvima za rad koje preduzeće posjeduje. Istakao je da je pokrivenost odvoza otpada na području općine 70%, te se prikupljanje vrši na klasičan način bez razdvajanja, u kontejnere koji su u gradskom području postavljeni bez utvrđenih pravila a površine za postavljanje kontejnera takođe nisu uređene. U ruralnim područjima otpad se prikuplja u vreće i posude koje obezbijede sama domaćinstva, i pražnjenja u gradskom području se obavljaju svaki dan a u ruralnim područjima jednom sedmično.

Prikupljeni komunalni otpad do 2012. godine vršen je na divlju deponiju na PK Koritnik, kada je ista zatrpana inertnim jalovinskim materijalom i od tada komunalno preduzeće iznalazi rješenja za deponovanje otpada. Od 2013. godine otpad se deponovao 14 mjeseci na deponiju u Varešu, zatim jedno vrijeme na regionalnu deponiju Smiljeviće u Sarajevu. Zbog velikih troškova transporta i nepravilnih kamiona odustalo se od odvoženja otpada na regionalnu deponiju Smiljevići. Još uvijek nisu izmirene obaveze preme ovoj deponiji u iznosu od 26.240,00 KM. Od 2014. godine otpad se odlaže na pretovarnu stanicu u Nedićima, gdje se otpad putem registrovanih prevoznčkih kuća odvozi na regionalnu deponiju Maščanica u Zenici. Obzirom na finansijske probleme koje ima preduzeće odvoz otpada se ne odvozi redovno i pretovarna stanica Nedići poprima oblik neuređene deponije na kojoj se gomila ogromna količina otpada koja predstavlja opasnost po zdravlje građana općine Breza. Preduzeće je ovim načinom deponovanja i transportom otpada do sada izdvojilo 130,000,00 KM a trenutna dugovanja prema prevozniku su 97.000,00 KM. Prema procjeni trenutno na pretovarnoj stanici Nedići imamo oko 500 kamiona otpada.

Od strane nadležnih inspeksijskih organa 20.02.2017 godine izrečena je zaštitna mjera zabrana daljeg odlaga otpada na navedenu lokaciju.

U daljem izlaganju g-din Hasanspahić upoznao je vijećnike o zakonskoj regulativi koja propisuje procedure način upravljanja otpadom i zaštitu okoliša po propisanim standardima.

U okviru propisane zakonske procedure i postavljenih ciljeva općina Breza je u okviru projekta „Upravljanja čvrstim otpadom“, Švedske agencije za razvoj (SIDA) izradila Plan upravljanja otpadom za period 2014. do 2019. godine i predstavlja detaljan opis postojećeg sistema za upravljanje otpadom te mjere koje teže unapređenju postojećih sistema kao bi se ostvario strateški cilj iz dokumenata višeg ranga. U okviru navednog projekta Švedska razvojna organizacija učestvovala je u sufinansiranju nabavke opreme u vrijednosti od 108.450,00 EURA. U 2015. godini u partnerstvu sa „EKOPAK“ operaterom ambalažnog otpada Sarajevo izvršili su nabavku 15 „IGLO“ kontejnera i finansirali izradu betonske podloge za 5 eko otoka. Nadležna služba izdala je Urbanističku saglasnost za 15 eko otoka i svih 15 eko otoka je opremljeno sa kontejnerima za selektivno prikupljanje otpadom i sa po jednim metalnim kontejnerom za miješani otpad.

Osnovni problem u realizaciji postavljenih ciljeva iz Plana je prostor odnosno lokacija na kojoj bi se izgradila reciklažna dvorišta i nedefinisan način mjesta deponovanja otpada.

U cilju dostizanja strateških ciljeva Općina Breza je izradila Plan prilagođavanja koji podrazumjeva prelazak sa postojećeg sistema upravljanja otpadom na regionalni princip upravljanja otpadom. Planskim dokumentom Federacije do 2020. godine predviđeno je 5 regionalnih deponija. Općina Breza je predodređena na regionalnu deponiju Smiljevići u Sarajevu i Moščanicu u Zenici i o tome će odluku donijeti Općinsko vijeće u ovisnosti od finansijskih pokazatelja i isplativosti odabranih lokacija.

Općina Breza je na osnovu istog izradila Plan prilagođavanja upravljanja otpadom za deponovanje otpada na PK Koritnik, unuta kojeg su jasno definisane aktivnosti na zatvaranju i sanaciji deponije i izgradnji (reciklažnih dvorišta). Plan prilagođavanja izradila je konsultantska kuća „Enova“ d.o.o. Sarajevo a isti je odobrio i Federalno ministarstvo za okoliš i turizam. Provođenje mjera i aktivnosti iz Plana prilagođavanja zahtjeva posjedovanje

adekvatne projektno-tehničke dokumentacije i posjedovanje neophodnih okolinskih i građevinskih dozvola. U postupku izrade idejnog projekta investiciono—tehničke dokumentacije i okolinske dokumentacije sanacije i rekultivacije postojeće deponije, projektant, u cilju sprečavanja negativnih uticaja deponije predlaže dva rješenja za sanaciju iste i traži mišljenje i saglasnost općinskih organa.

Sanacija postojeće deponije u smislu izolovanja otpada od okoline sa dvije varijente

#### I varijenta

- sanacija postojeće deponije i njeno zatvaranje bez daljeg odlaganja otpada
- sanacija postojeće deponije sa formiranjem tijela depozita za odlaganje otpada naredne četiri godine i nakon toga njeno zatvaranje.

#### II varijenta

- iskop kontrolisanih bunara ispod lokacije deponije i prikupljanje podzemnih voda koje su pod eventualnim uticajem deponije čime bi se zaštitio kvalitet podzemnih voda ispod deponije.

Pomičnik općinskog načelnika Salih Hasanspahić dao je prijedloge za rješavanje identifikovanih problema komunalne djelatnosti i treba djelovati na sljedeći način.

- Prevažavanje postojećeg stanja - hitno iznalaženje rješenja za tekuće odlaganje otpada i uklanjanje postojećeg otpada iz tzv. Pretovarne stanice „Nedići“
- Kontinuirano sa prevazilaženjem postojećeg stanja iznači način trajnog rješavanja problema komunalne djelatnosti prikupljanja, odvoza i deponovanja otpada u skladu sa zakonskom regulativom u smislu postizanja Strateškog cilja 1. Strategije upravljanja otpadom.

Mjere za postizanje Operativnih ciljeva, a time i navedenog strateškog cilja, koje se moraju primjeniti u cilju trajnog rješavanja problema upravljanja otpadom na području općine Breza, a koje su utvrđene zakonom i podzakonskim aktima su:

- Iznalaženje lokacije za reciklažno dvorište i opremanje istog sa potrebnom infrastrukturom,
- nastaviti sa aktivnostima na izradi Investiciono-tehničke i okolinske dokumentacije za sanaciju i rekultivaciju postojeće deponije i izgradnju pratećih sadržaja prilagođenih regionalnom konceptu odlaganja,
- Iznalaženje lokacije/lokacija za odlaganje inertnog otpada,
- Stavljanje u funkciju postojećih zelenih otoka (otoci koji imaju urbanističku saglasnost),
- Organizovanje i opremanje zelenih otoka i na ostalim područjima općine Breza,
- Nabavka kamiona smećara,
- Proširenje obuhvata prikupljanja otpadom na cijelo područje Općine Breza,
- Edukacija korisnika komunalnih usluga (u smislu smanjenja količina otpada i načina odlaganja otpada),
- Izvršiti Izmjene i dopune Odluke o komunalnom redu – Poglavlje IV sakupljanje, odvoz i postupanje sa sakupljenim otpadom (Izmjenama normirati odvojeno prikupljanje otpada i utvrditi kaznene odredbe za kršenje istih),
- Donijeti novu Odluku o cijenama komunalne usluge prikupljanja, odvoza i deponovanja otpada (Cijene utvrditi po jedinici zapremine odloženog otpada po pojedinim vrstama otpada).

Na osnovu naprijed iznesenog, predlažemo da Općinsko vijeće, u skladu sa svojim zakonskim nadležnostima i odgovornostima, donese Zaključak za izvršenje naprijed navedenih mjera, sa nosiocima aktivnosti i rokovima za izvršenje, kako bi se konačno trajno riješio problem upravljanja otpadom na području općine Breza.

Predsjedavajući Općinsko vijeća Jusić Vedad je iznio stav kluba SDA.

Pristigli materijal za tematsku sjednicu nije u vezi sa dnevnim redom temtske sjednice i sa dogovorenom temom sa stanka predsjednika klubova parlamentarnih stranaka.

U materijalima nema uvida u :

- plan finansiranja operativnih troškova,
- elaborat o uticaju projekta na okoliš i životnu sredinu,
- investicioni plan i plan implementacije, mjerljive indikatore, očekivane rezultata,
- uvid u trenutačno stanje otpada na području Općine Breza.

Prema preporukama kantonalnog nivoa vlasti potrebno je postojeće divlje deponije na području Ze-Do kantona evidentirati i mapirati u elektronsku kartu i ucrtati u kataster postojeće divlje deponije rangiraju prema prioritetu u smislu mogućnosti uklanjanja i opasnosti po okoliš. Izvršiti fotografisanje svih deponija, procjena obima odloženog otpada, kao i procjenu načina čišćenja i vremena čišćenja, te predložiti program mjera za podizanje svijesti u upravljanju otpadom.

Kada se označe potencijalne lokacije za izgradnju reciklažnog dvorišta obavezno konsultovati Mjesne zajednice.

Napraviti Plan upravljanja otpadom na području općine Breza i prilagoditi ga Planu upravljanja otpadom kantonalnog nivoa koji je usvojila Skupština vlade ZE-DO kantona i koji daje jasne smjernice za upravljanje komunalnim otpadom na području svih općina ZE-DO kantona.

Na osnovu naprijed navedenog: predlažu sljedeće.

- Da nadležna služba pripremi Plan upravljanja komunalnim otpadom uz finansijski plan za područje općine Breza i da naznače tačne lokacije za reciklažna dvorišta o kojima će se Općinsko vijeće očitovati.
- Nakon toga pristupiti izradi i implementaciji Programa mjera za podizanje svijesti o upravljanju komunalnim otpadom.

Provođenjem legalne procedure i poštivanjem pravila i smjernica za upravljanje komunalnim otpadom imaćemo i podršku viših nivoa vlasti te obezbijediti pristup evropskim fondovima.

Kada je u pitanju prijedlog o Sanaciji postojeće deponije u smislu izolovanja otpada od okoline sa dvije varijante, podržava varijantu I.

- Sanacija postojeće deponije i njeno zatvaranje bez daljeg odlaganja otpada.

Vijećnik Kadrić Memsud istakao je da je vrlo alarmantno stanje po pitanju deponovanja otpada i da Općinsko vijeće mora iznaći rješenje i ponuditi lokacije za stvaranje uslova otvaranja reciklažnih dvorišta, obzirom da nas EU prisiljava na prelazak upravljanja otpadom po evropskim standardima i korištenje komunalnog otpada kao sirovine. Predložio

je vijeću lokaciju za reciklažno dvorište na loklitetu „Grbina“ koje teritorijalno pripada Općini Breza .

Općinski načelnik Munib Zaimović slaže se sa činjenicom da se radi o veoma složenom ali ne i nerješivom problemu kada je pitanju problem prikupljanje, odvoza i deponovanje otpada. Predlaže da se nastoji iznaći generealno rješenje što je svakako prelazak na regionalnu deponiju. Obzirom da je ovaj problem prisutan u Varešu i Visokom susjednim općinama Breza i Visoko predlaže da se u saradnji sa ovim općinama pokuša naći zajedničko prihvatljivo rješenje. Prvenstveno treba krenuti u sanaciju registriranih divljih deponije. Kroz reciklažu otpada smanjiti količinu otpada koji će se odlagati na regionalnu deponiju. Područja za odvoz otpada pokriti sa dovoljnim brojem kontejnera te uticati na svijest građana i potrebi recikliranja otpada.

Vijećnik Sirotanović Arif takođe je mišljenja da se radi o složenom problemu koji se što prijem mora početi rješavati. Predlaže konkretno rješenje, da iznos kojim se plaća dnevni odvoz otpada usmjeri na kupovinu dva kamiona za odvoz otpada, putem lizinga, koji će se isplatiti za veoma kratko vrijeme. Prvenstveno treba riješiti pretovaru stanicu Nedići koja predstavlja ekološku bombu. Takođe ističe da treba raditi na povećanju svijesi građana da se ponašaju u skladu sa pravilima te da otpad odlažu na predviđena mjesta na propisan način, po potrebi uvesti i represivne mjere za nepoštivanje pravila. Na kraju izlaganja ponudio je pomoć ORB “Brezanski rudari” kao pomoć na uklanjanju divljih deponija.

Vijećnik Muratović Namik pokrenuo je pitanje odgovornosti za one koji su dopustili da dođe do ovakve katastrofalne situacije po pitanju problema deponovanja otpada i stvaranja deponije pretovarne stanice Nedići, gdje trenutno ima oko 500 kamiona otpada i koji predstavljaju veliki problem. Sramota je da pored svih upravljačkih i nadzornih struktura dođe do ovakvog stanja i zašto se sve radi sa zakašnjenjem u rješavanju, obzirom na karakter i obim problema. Ponovo insistira na pokretanju odgovornosti za one koji su po službenoj dužnosti trebali voditi računa i blagovremeno prići rješavanju. Smatra da procedure koje su pokrenute za donošenje planova upravljanje otpadom na nivou naše općne mogu doći u koliziju, obzirom da se na višim nivoima planira doneoeshnje novih strategija i planova za upravljanje otpadom.

Vijećnik Avdić Edin ističe da je problem o kojem danas govorimo jako kompleksan i složen i da je to cijela nauka. Podsjeća da je na nivou općine usvojena Odluka o usvajanju Plana upravljanja otpadom na području općine Breza za period 2014-2019 godine. Implementaciju Planaupravljanja otpadom u svim njegovim segmenima prema utvrđenoj dinamici i rokovima za realizaciju vršit će radna grupa za provođenje plana u koju se imenuju šefovi i službenici Službeza prostorno uređenje, zaštitu okolice i geodetske i imovinsko pravne odnose i Služba za privredu i Služba za finansije, inspekciske poslove i opću upravu, tehnički direktor JP Komunalno d.o.o. Breza i predstavnik udruženja građana. Projekat se realizira u saradnji sa Švedsko vladom. Donešen je i finansijski plan po fazama realizacije od izgradnje potrebne infrastrukture do saniranja postojećih deponija. Predlaže da se ponovo formira radna grupa koja će Općinskom vijeću ponuditi kvalitetna rješenja u skladu sa propisima i strandardima.

Vijećnik Bajrić Fetah smatra da Općinsko vijeće i mendžment komunalnog preduzeće traba da odgovore na ključno pitanje koj je dozvolio da se u pojasu vodozaštitne zone stvori ovakva ekološka bomba koja trenutno predstavlja veliki problem i opasnost za građane Breze.

Predlaže sljedeće:

- pretovarnu stanicu u Nedićima hitno ukoloniti,
- obezbijediti odvoz otpada sa svih područja općine Breza i obezbijediti dovoljan broj kontejnera i posuda, te uspostaviti redovnu naplatu odvoza otpada.
- izvršiti reciklažu otpada

- da nadležna općinska služba Općinskom vijeću ponudi više lokacija sa potrebnim parametrima kako bi se izabralo najpovoljnije rješenje , pa tek onda donijeti Odluku.

Vijećnik Suljagić Mirzet predlaže lokacije za reciklažno dvorište na „Grbini“, na PK Koritniku i PK Gornja Breza. Izvršiti recikliranje otpada i ostatak deponovati na regionalni deponiju.

Predsjednik NO. JP „Komunalno“ d.o.o Breza Seid Opačin istakao je da je stanje u Komunalnom preduzeću složeno i da je zbog pogrešnog poslovanja proteklih godina isto dovedeno u nezavidan položaj. Prilikom kontrole uočene su mnoge nezakonite radnje i negativne pojave počev od nelegalnog zapošljavanja pa do nenamjenske i nezakonite potrošnje, koje su preduzeće dovele u jako težak finansijski položaj. Za ovakvo stanje odgovornost snosi i osnivač preduzeća koji je na vrijeme i na zakonit način trebao riješiti problem lokacije za odlaganje otpada odnosno lokacije za reciklažno dvorište gdje bi se zadovoljili propisani standardi.

Vijećnik Bajrić Fetah smatra da je ovo Općinsko vijeće dovedeno u zabludu i da niko od nadležnih organa nije pitao Općinsko vijeće niti je dat bilo kakav prijedlog za rješavanja problema. Odgovornost snosi i predstavnik ispred osnivača, predsjednik skupštine JP. Podsjeća da je Općinsko vijeće donijelo Zaključak u cilju obezbijedenja uslova za redovno poslovanje preduzeća, dok traje kreditno zaduženje. Naloženo je Upravi preduzeća provođenje mjera i da o realizaciji mjera iz tačke I zaključka izvještava Općinsko vijeće svakih 60 dana. Kome su odgovorni NO i ko je odgovorno lice ispred općine Breza.

Vijećnik Avdić Edin pojašnjava da je za zakonitost odgovoran predlagač.

Predlaže cjelovito rješenje. Kreće se od domaćinstava koja se moraju edukovati da pravilo recikliraju i odlažu otpad i za to stvoriti potrebne uslove. 60-70% komunalnog otpada predstavlja sekundarne sirovine koja se mogu koristiti kao sirovina za dobijanje novog proizvoda. Predlaže da se oformi radna grupa koja će ponuditi kvalitetno rješenje.

Savjetnik Općinskog načelnika Enver Hadžiahmetović upoznao je vijećnike o mogućnosti izgradnje 100% ekološki prihvatljivog postrojenja za tretiranje komunalnog otpada po uzoru na evropski grad Beč, pema kojem nema ni deponija ni reciklaže i od otpada se proizvodi toplotna i električna energija. Vrijednost projekta je oko 100 miliona, te da Breza ima ponudu za izgradnju ovog postrojenja. Predlaže vijećnicima da razmisle o ovoj ideji.

Na prijedlog predsjedavajućeg uslijedila je pauza radi donošenja zajedničkog Zaključka (18,10 do 18,35)

Nakon pauze predsjedavajući Općinskog vijeća predložio je sljedeći:

## Z A K L J U Č A K

### I

Da se nastavi sa mjere za postizanje Operativnih ciljeva, a time i navedenog strateškog cilja trajnog rješavanja problema upravljanja otpadom na području općine Breza, a koje su utvrđene Zakonom i podzakonskim aktima.

- Iznalaženje lokacije za reciklažno dvorište i opremanje istog sa potrebnom infrastrukturom,
- Iznalaženje lokacije/lokacija za odlaganje inertnog otpada,

- Stavljanje u funkciju postojećih zelenih otoka (otoci koji imaju urbanističku saglasnost),
- Organizovanje i opremanje zelenih otoka i na ostalim područjima općine Breza,
- Nabavka kamiona za odvoz komunalnog otpada.
- Proširenje obuhvata prikupljanja otpadom na cijelo područje Općine Breza,
- Edukacija korisnika komunalnih usluga (u smislu smanjenja količina otpada i načina odlaganja otpada),
- Izvršiti Izmjene i dopune Odluke o komunalnom redu – Poglavlje IV sakupljanje, odvoz i postupanje sa sakupljenim otpadom (Izmjenama normirati odvojeno prikupljanje otpada i utvrditi kaznene odredbe za kršenje istih),
- Donijeti novu Odluku o cijenama komunalne usluge prikupljanja, odvoza i deponovanja otpada (Cijene utvrditi po jedinici zapremine odloženog otpada po pojedinim vrstama otpada).
- da nadležna općinska služba u roku od 30 dana pripremiti određenu dokumentaciju sa prijedlogom 3-4 lokacije za reciklažno dvorište.

## II

Da se nastave aktivnosti na sanaciji postojeće deponije i njeno zatvaranje bez daljeg odlaganja otpada na PK Koritnik.

## III

Zadužuje se Općinski načelnik da u saradnji sa menadžmentom JP Komunalno d.o.o. Breza, iznađe mogućnost privremenog odlaganja otpada.

## IV

Za realizaciju tačke I i II zadužuje se Služba za privredu i menadžmenta JP Komunalno d.o.o. Breza.

Nakon provedenog postupka glasanja konstatovano je da je predloženi zaljučak usvojen jednoglasno sa 16 glasova ZA , bez protiv i suzdržanih glasova.

Tematska sjednica Općinskog vijeća Breza završila je sa radom u 19,00 sati.

Sastavni dio ovog zapisnika čini i tonski zapis sjednice.

ZAPISNIK SAČINILA  
Zakira Smailbegović,s.r

PREDSJEDAVALA  
Općinskog vijeća  
Jusić Vedad,s.r